

لحن غريق



قريت الفاتحة على روي

وحبة قمح للصدقة

وسبت الروح ف إيد ربي

ومستسلم لأمر الله

وركعة تهدي في جروحي

فذنّب البعد مش ذنبك ولا ذنبي

دا أمر الله

لكين في القلب كام بطحة

ببتقلّب وجع في حياة

ودقة قلب مش ساكتة

تقول الآه...

بنقطة ماَّيه انا عايش

كما الصايم بيستنى آدان فرحه

وبلَّة ريق...

وعين خجلانة من دمعة

تشقَّ الخدِّ ومسافرة

تداري الحزن بالضحكة

بتتعلَّق في حبل نجاة

ودقَّة خوف بقت نعمة

في لحن غريق..

وهدَّة حيل...

بتتبعتر ف ألف طريق

ولسه باعاند الدقَّة

وماشي بدقة ع الوصفة

ورا عشقي عملته دليل

وكل ما روجي تتكفى

أقوم واصفى

واعيد الخطوة م الأول

في بحر الليل

عيون بتشدّ في حبالنا

فواقفة لنا...

كشوكة ف حلق

وليه الدنيا فايقة لنا

وسايبه الخلق؟!!

وليه الدنيا فايقة لنا

وسايبه الخلق؟!!